

Ministru Estadu Prezidência Konsellu Ministrus

AGIO PEREIRA



DISKURSU ENSERAMENTU

16+ FORUM *SHOWCASE* ANUÁL 2019
REKONSILIASAUN, INSTITUISOINS FORTE NO INKLUZAUN
DILI, TIMOR-LESTE

11 - 14 Novembru 2019

Exelénsias,
Señores & Señoras,
Karu kolega sira,

Lori S.E. Primeiru-Ministru, Taur Matan Ruak nia naran, ha'u hato'o agradesimentu ba ita hotu nia partisipasaun; Ami mós apresia ho servisu maka'as ne'ebé hala'o tiha ona husi komisaun organizadora, no mós apoiu husi patrosinadór sira ba konferénsia ida-ne'e, hodi halo iventu importante ida-ne'e sai posivel no produtivu.

Timor-Leste apresia ita-boot sira-nia disponibilidade hodi hamutuk ho ami iha ita-nia esforsu atu haree ba tópiku kompleksu sira ne'ebé sai hanesan parte intrínseka husi Ajenda Internasionál nian.

Iha planeamentu ba Forum *Showcase* ida-ne'e, Timor-Leste iha objetivu primordiál ida – atu permite espasu ba diskusaun sobre 16+ ODS (Objetivos Dezenvolvimentu Sustentavel), hodi deskute planu asoins auténtiku, efikás no inkluzivu, sein liafuan diskursu prozaiku.

Señores & Señoras,
Distintus Konvidadus,

Iha *Showcase* Anuál 2019 ida-ne'e, servisu intensivu hala'o daudaun durante sorumutu loron haat nia laran. Ho sesaun plenária tolu *ein-media* kada loron, oradores liu hitu-nulu husi países oioin, reprezenta organizasoins internasionál no rejionál, ho rezultadu enkorajante tebes ho sensu forte ida atu avansa ba oin.

Tanba ne'e, ami-nia Governu simu ho di'ak rezultadu husi 16+ Forum *Showcase* ida-ne'e – Sorumutu Globál ida ba desizores polítikas 16+ ODS nian, pratikantes no lider sira –

ne'ebé kontribui ona ba fortifikasaun ita-nia relasaun globál komprensivu, firme no benefisiál, hodi maximiza potenciál ba asaun konjuntu entre ita-nia nasaun no instituisaun sira.

Loke ho tema *Rekonsiliaun, Instituisoins Forte no Inklusaun*, Forum Showcase ba datoluk ida-ne'e tau fiar ba individuál, organizasaun no instituisaun sira, ne'ebé servisu ba promosaun no protesaun direitus umanus, inklui defensór direitus umanus nian sira, ne'ebé presta tiha ona deklarasoins koerente no efikás kona-ba importánsia husi ODS16, hodi alkansa Ajenda 2030 nian.

Señores & Señoras,
Distintus Konvidadus,

Meta 16 ODS nian sobre Justisa, Paz no Instituisaun forte inklui presizu ba instituisoins kapás no inkluzivu hodi promove partisipasaun sidadaun hotu-hotu nian iha prosesu demokrátiku no polítika inkluziva “la husik liu ema ida iha kotuk”.

Hanesan país insulár ki'ik ida no se joven, tinan sanulu-resin-hitu desde nia restaurasaun independénsia, Timor-Leste rekoñese dezafiu sira sobre dezvoltimentu sustentavel. Prinsípius ne'ebé orienta ona ami-nia Planu Estratéjiku Dezvoltimentu no polítikas nasional definidus, tau ba iha neon sobre sustentabilidade krusiál atu alkansa estabilidade, dezvoltimentu, paz no *bein-estar*, hodi permite ita-nia jersaun sira iha futuru moris ho saudável no gratifikante.

Indikadores xave ekonómiku ne'ebé otimista no padraun-referénsias replete progresu ba ami-nia senáriu polítiku no instituisoins – la'o liu dalan naruk, iha tempu ida relativamente badak, dook husi ruinas ardentes dékada rua liubá.

Ami-nia Revizaun Nasionál Voluntária (VNR), hala'o iha Forum Polítiku Altu Nivel Nasoins Unidas nian iha 2019, foti estoke polítikas ne'ebé ami dekreta tiha ona desde independénsia no

avalia kontribuisaun polítika hirak ne'e hodi hakat ba Timor-Leste nia desenvolvimentu sustentavel, iha enkuadramentu Ajenda 2030 nian ba Dezenvolvimentu Sustentavel.

VNR ne'e mós ezamina áreas ne'ebé dala ruma se falta iha ami-nia polítikas, no oinsá ami bele hakonu limitasaun hirak-ne'e hodi alkansa Objetivus Dezenvolvimentu Sustentavel (ODS) ho di'ak-liu tuir prinsípius responsabilizasaun no transparénsia, mak hanesan ami-nia abordajen tempu-naruk nian no prospetiva ba desenvolvimentu sustentavel, no ami-nia determinasaun atu foti desizoins difisil ne'ebé nesesária ba desenvolvimentu nasional.

Bazea-ba konsiderasaun sira iha leten, no ho referénsia ba instrumentus legais, ha'u hakarak hato'o apresiasaun husi ami-nia governu ba organizasoins sosiedade sivil nia servisu, liuliu iha apresentasaun relatóriu kualitativu ida ne'ebé simplifika indikadór sira ODS nian.

Ami-nia Parlamentu Nasionál aprova tiha ona rezolusaun ida iha 2015 hodi apoia implementasaun ODS no endorsa aliñamentu planu no orsamentasaun ba ODS.

Ami-nia Governu konsidera daudaun estabesimentu mekanizmu integradu ida, atu permite engajamentu husi partes interesadas hotu-hotu, parte hotu-hotu sosiedade nian, iha diálogo ida ne'ebé intensivu no produtivu liu. Nia objetivu mak atu enkarrega envolvimentu sosiedade sivil nian iha prosesu toma-desizaun relasiona ho kompromisu atu asegura viabilidade Ajenda 2030 nian.

Señores & Señoras,

Distintus Konvidados,

Iha loron sira resente, kestoins importante ne'ebé debate ona iha plenária, kobre:

1. Hakotu violénsia hasoru labarik no redús pobreza;
2. Promove estadu-de-direitu iha nivel nasional no internacional sira, garante no intensifika asesu justisa ba hotu-hotu; no

3. Haforsa instituisoins;

No konkluziun prinsipál konsentra iha esforsus nesesárias hodi hakat ba oin alkansa Objetivus Dezenvolvimentu Sustentavel 16, ba prestasaun servisu públikus no dezenvolvimentu ekonómiku maiz amplu, direitus no oportunidades iguál, no promove asaun ne'ebé intensivu no inkluzivu liu.

Kestoins governasaun iha ámbitu inkluzivu ida; no instituisaun sira servisu ba fornese proteasaun legál própriu ba sira ne'ebé foin hahú negósiu ho risku-médiu, no ajuda emprezáriu sira komprende no banati tuir alterasoins lejislativas – ne'e hanesan esforsus importante tebtebes.

Parseria ho Kámara Komérsiu no Indústria Timor-Leste nian (CCITL) oferese possibilidade ba fortalese rede ezistente. Dezenvolve redes lokais ho envolve universidades, asosiasoins, instituisoins finanseira no mídia, ne'e mós promove espíritu empreendedorizmu nesesária.

Señores & Señoras,

Distintus Konvidadus,

Hafoin tinan 24 luta ba libertasaun nasional, Timor-Leste no Indonézia, liu-husi Komisaun Verdade no Amizade, harii prosesu verdade no rekonsiliaun ida ne'ebé onestu no signifikativu, hodi haree ba futuru no servisu hamutuk ba dezenvolvimentu nasional.

Relasaun polítiku amigavel no fraterna entre nasaun rua ne'e fó ezemplu ida ne'ebé nasaun seluk iha mundu ida-ne'e seidak halo. Ne'e sai hanesan proeminénsia polítiku no sosiál tanba ho vontade di'ak ne'ebé Estadu soberanu rua ne'e fahe-ba-malu no espíritu Povu rua ne'e nian, ho kompromisu ida entre lider sira atu define vizaun forte hodi haree dook liu tiha husi pasadu.

Hanesan viziñus, Timor-Leste no Indonézia sei kontinua buka dalan atu haforsa liután relasaun bilaterál no atende kestoins interese nasional. Rekonsiliaun no estabilidade nasional sei nafatin influensia relasoins no konstitui grandes prioridades políticas.

Pesoalmente, no lori Governu Timor-Leste nia naran, ami realmente akredita katak espíritu amizade no vizaun ba futuru sei kontinua inspira Timor-Leste no Indonézia iha kamiñu naruk husi relasoins bilaterál ne'ebé kompleksu, tau ba iha neon katak to'o ikus ida-ne'e sei fó benefisiu ba nasaun rua ne'e no nia ema sira.

Hanesan ho rekonsiliaun no justisa ne'ebé tama ona iha diskursu neoliberál sobre Direitus Umanus, la'o hamutuk ho globalizasaun ba normas direitus umanus, Timor-Leste partisipa iha grupu países seletu ida ne'ebé Nasoins Unidas mak asume ona papél prinsipál iha Konstrusaun Nasaun no Konstrusaun Paz, enfatiza Unidade Nasionál.

Ha'u lembra fali oinsá komisaun estabilesida husi Timor-Leste no Indonézia – Verdade no Amizade - partikularmente foka ba divulgasaun faktus. Maski nune'e, ami rekoñese katak se iha servisu todan ne'ebé tenki hala'o.

Señores & Señoras,

Distintus Konvidadus,

Iha interpretasoins oioin husi akadémiku no ativista sira sobre narrativas diferente ba rekonsiliaun.

Iha Timor-Leste narrativa hirak-ne'e tende atu apresenta hanesan “narrativas rekonsiliaun rua”. Rekonsiliaun nu'udar “narrativa husi polítiku sira”, ne'ebé aludidu

hanesan “projetu”; no ida seluk mak “narrativa husi vítimas” ne’ebé importante, deskreve hanesan “prosesu”.

Sein tama ba iha kompleksidades problemas no análise klean, ema bele konklui ho hanoin ne’ebé sala tanba Timor-Leste la bele haluha narrativa sofrimentu kolektiva, ne’ebé seidauk salva Timór-oan ruma, no ne’ebé polítiku sira mós sai ona hanesan alvu.

Timor-Leste nia lider no polítiku sira mós sujeitu ona ba privasaun grave. Sira-nia papél mak atu lidera ho responsabilidade, toma konsiderasaun fatores multiplu ne’ebé kontroversiál beibeik. Intereses instituisaun sira nian, inklui Estadu rasik, no mós Povu hirak ne’e, liuliu vítima sira, hotu-hotu ezije katak lideransa polítika adota abordajen ida ekilibradu no sustentavel.

Señores & Señoras,
Distintus Konvidados,

Timor-Leste sei kontinua dezenvolve progresu iha jornada ida-ne’e hodi hakat ba alkansa Ajenda 2030 nian no avansa ba oin.

Sorumutu durante loron haat ne’e mós sai hanesan instantáneu ida husi Timor-Leste nia progresu to’o loron-ohin, prosesu ida ne’ebé tenke sai hanesan lembrete poderozu, katak dezenvolvimentu sustentavel nu’udar jornada ida ne’ebé rekere ita hotu-hotu nia kompromisu kontínuu.

Permite ha’u hodi sita sa’ida mak Koordinadór Rezidente ONU nian, Sr. Roy Trivedy dehan iha Forum ida-ne’e:

“Iha Timor-Leste, ba nia dezenvolvimentu iha faze tuirmai, ita presiza garante katak progresu ne’ebé alkansa tiha ona iha fortalamentu paz, seguransa no sistema eleitorál iha

últimu tinan 20 ne'e, presiza eleva tan husi énfaze maiór ba fortifikasaun kapasidades institusionál no individuál ba sidadaun hotu-hotu (feto no mane, joven no idozu)".

Iha kontestu ida-ne'e ne'ebé Timor-Leste sei halo esforsu tomak hodi dezenvolve ninia sistemas boa-governasaun, no mós transparénsia no responsabilidade servisu públiku nian, promove igualdade jéneru no intensifika inklusaun sidadaun hotu-hotu nian sein kualkér forma diskriminasaun, atu asegura koezaun sosiál no armonia, hodi evita konfliktu no avansa ba oin.

Ho forma ida ne'e, ha'u fahe vizaun husi ita-nia Laureadu Nobel da Paz, Dr. José Ramos-Horta katak "iha tinan 2030 Timor-Leste sei sai país ida ho rendimentu aas, prósperu, livre no iha paz. Estadu-de-direitu sei sai konsolidadu."

Obrigadu ba ita hotu nia atensaun.